

九指狀元

傳統戲劇劇本

今生才大狀元郎
前世耿性歌女娘
輪迴只因重業障
放下即時心清涼

創作理念

本作品係以客家語四縣腔撰寫而成。

就像梁祝故事最初基型只是簡短的「義婦祝英台與梁山伯同冢」寥寥數字而已，加上民間流傳，後來才有各類劇本小說的出現。本作品之發端為筆者的一位長輩從其父祖輩口中所聽到的一則故事，而他是從「傳仔」看來的，在網路搜尋也只找到一則數百字的故事，與前者所講的大同小異，除此之外，未曾聞閱類似故事之文章及作品。

筆者根據故事梗概，稍加更動，進而添枝加葉插科打諢創作而成，其中提及的佛理，以戲劇效果為重，不應全以宗教或迷信看待。

隨著科技文明的進步，社會風氣逐漸走向奢華浮誇，只重外表，不論是非。本作品除故事離奇曲折外，旨在勸世人要平等待人，且要有一顆向善愛人的心，此乃當今社會所欠缺者。

劇情大綱

盧玉雪自幼因家貧被賣至妓院，由老鴇阿惜姨撫養長大，長大以後成為怡紅院頭牌名妓，盧玉雪雖身在青樓，卻本性善良，一心向佛，常捐獻錢財供養寺廟；但其性情卻十分高傲剛烈，嫉惡如仇。

錢穆開為縣城首富，在怡紅院結識盧玉雪，並為之傾倒，欲納盧玉雪為妾，盧玉雪因不願破壞他人家庭婚姻之幸福而予以婉拒，阿緣姨軟硬兼施亦無效果。錢穆開找來兩位義弟共商大計，於東窗之下密謀對策：威脅廟方不能接受盧玉雪的供養，又到處散佈不利盧玉雪的耳語，如盧玉雪乃殘花敗柳之身，沒有資格拜佛，所賺之錢乃不潔之財，不能供佛。三人之目的是要盧玉雪顏面盡失無法做人，等盧玉雪孤立無援時，再趁虛而入，逼其就範。

盧玉雪得知外頭謠言四起，又感到受人冷言冷語不理不睬，正在納悶，恰巧錢穆開勸其下嫁於他，盧玉雪一時氣憤，將自己的左手小指切下交給錢穆開，藉以表明心跡，錢穆開莫可奈何，知難而退。

從貼身婢女梅香處，盧玉雪又得知廟方將捐獻造塔之芳名錄，將其名字改成「無名氏」，又將其捐為重塑金身之資，移為蓋廁所之用，盧玉雪遂至寺廟找監寺理論，雖經監寺曉以大義，勸其有心最重要，勿執著於外表形式，但盧玉雪仍無法釋懷，撞柱而亡。監寺憐其無親人祭祀，乃由廟方收埋，並將左手小指藏於樑上。

盧玉雪死後，魂魄來到幽冥地界森羅寶殿，向閻羅天子喊冤哭訴委屈，閻羅王勸其真心懺悔過去的業障，才能業消福至，並念其供佛有功，判盧玉雪投胎為男身，出生在富貴之家，長大後高中狀元，視其作為，再觀後效。

盧玉雪投胎轉世為馮文彬，從小聰明伶俐，飽讀詩書，出口成章，下筆成文，其塾師對其讚譽有加。十八歲時，父母令其趕赴科考，翌年三元及第，奉旨遊街三日，途經相國寺，感覺似曾相識，及進相國寺，住持已恭候多時，並對左右言：九指狀元即將到來。

住持乃當年之監寺，將馮文彬之前世今生敘述一番，馮文彬不信，住持把藏於樑上之小指取下，接回馮文彬左手，不但密合，而且活動正常，馮文彬頓悟世

事無常，輪迴痛苦，凡事不須執著，便欲求住持為其剃度出家，住持以未經過父母同意，不得剃度出家為由，勸其先修習斷除自家的執性與心病，等塵緣了卻，因緣具足後，菩薩自然會讓其父母歡歡喜喜答應他出家。

馮文彬受相國寺住持感召，遂回朝代天巡狩，以德化民，好善樂施護持佛法僧如前生；因青年才俊獲招為駙馬，後又因治績輝煌而被擢升為宰相；晚年皈依佛門，成了佛門弟子。

人物表

盧玉雪：京城怡紅院名妓，性情高傲，篤信佛教，時常捐獻。因不願破壞錢穆開家庭，斷指以明志，後不滿寺廟將其捐獻移做他用，憤而撞柱而亡。死後，陰魂不散，至森羅寶殿向閻羅王訴冤，閻羅王念其供佛有功，判投胎為男身，高中狀元。

梅 香：盧玉雪之貼身婢女，活潑外向，忠心事主。

阿緣姨：本名薛緣，怡紅院老鴿，從小撫養盧玉雪長大。

錢穆開：縣內首富，欲娶盧玉雪為妾，定計陷害盧玉雪，使其無法立足，孤立無援，再趁虛而入，逼其就範。

金博文：錢穆開結拜之二弟，陰沉富計謀。

歐樹林：錢穆開來結拜之三弟，為人輕浮。

性 空：相國寺監寺，由於無法堅持原則，致使盧玉雪含冤而死；後為住持，略具神通，為馮文彬開導前世今生之因果，馮文彬因而出家為僧。

悟 明：相國寺小沙彌，活潑廣結善緣，後為知客。

馮文彬：前生為盧玉雪，投胎為男身，生在富貴之家；後高中狀元，重遊舊地，得知前因後果，受相國寺住持感召，遂回朝代天巡狩，以德化民，好善樂施護持佛法僧如前生；因青年才俊獲招為駙馬，後又因治績輝煌而被擢升為宰相；晚年皈依佛門，成了佛門弟子。

馮志遠：馮文彬之父，廣東梅縣人氏。

馮夫人：馮文彬之母，廣東梅縣人氏。

阿 富：馮文彬之書僮，忠心護主，隨馮文彬上京赴考。

其 他：閻羅王、判官、牛頭、馬面、黑無常、白無常、馬伕、眾舞女、眾鬼役、眾鬼魂、眾儀仗。

目 次

第一場	身世	1
第二場	密謀	8
第三場	行香	12
第四場	逼婚	16
第五場	斷指	18
第六場	自絕	23
第七場	投胎	26
第八場	赴考	30
第九場	重逢	34

九指狀元

第一場 身世

人物：盧玉雪、錢穆開、女婢梅香、眾舞女

場景：怡紅院酒樓內，明月高掛个暗晡頭

△幕啓，眾舞女載歌載舞，盧玉雪、錢穆開高坐在上，女婢梅香在旁執壺勸酒。

眾舞女：（唱剪剪花）

今夜月色真美麗，
姑娘人靚好骨肢；
八音齊奏聲入耳，
柳腰輕搖眼傳媚。

△歌舞持續。

錢穆開：玉雪你也落去跳一下！

△玉雪加入歌舞行列。

盧玉雪：（唱上山採茶）

人生可比一齣戲，
鹹酸苦甜不由己；
勸君行樂愛及時，
莫待春過空稀微。

△歌舞畢，眾舞女下，玉雪返座。

錢穆開：跳了真好！跳了真好！

盧玉雪：係錢大爺無棄嫌，來！錢大爺再過乾一杯！

△錢穆開爽快乾一大杯，欲言又止。

錢穆開：嘿！嘿！嘿！吾个一個好玉雪！上擺佢拜託阿緣姨同你問个該件事情，
你毋就趕緊分佢一个回答！

盧玉雪：麼个事情？阿緣姨無同佢講啊！

錢穆開：都到這個時節了，你莫再過同佢講這兜花撩个話了，人講啊：「花花假
假，雷公會打」喔！

盧玉雪：到底係麼个事情？

錢穆開：敢還有別項？就係愛同你贖身个事情啊！

九指狀元

盧玉雪：錢大爺，你毋好同佢講笑啦，你係一個有舖娘个人呢！哪使得做出對毋起若舖娘个事情來呢？

錢穆開：唉呀！你頭下毋係唱講：「行樂愛及時」？

盧玉雪：佢係勸你「及時行樂」無毋著，毋過佢並無勸你「拋妻棄子」啊！

錢穆開：麼人講佢愛「拋妻棄子」，佢只愛「金屋藏嬌」定定。

盧玉雪：毋管你係愛「拋妻棄子」，也係愛「金屋藏嬌」，都係對若舖娘不忠不仁，佢若恁樣做，敢毋係變成一個大罪人了，錢大爺，你愛想較清楚兜！

錢穆開：（無歡喜）好了！好了！佢無愛聽你講一千擔大道理，無採佢同你幫襯恁久了，開个銀兩做得講係包山塞海不計其數了，你想看仔，當初若無佢，你哪有法度變做怡紅院个頭牌；再過講，這乜係佢个一番好意，佢愛救你脫離苦海呢！

盧玉雪：錢大爺，你聽佢慢慢講來……

（唱平板）

錢爺聽佢來解勸，
佢乜盡想愛答應；
夫人屋下日日等，
等無老公心怪怨。
逢場作戲細事件，
妻離子散大不幸；
凡事不可只顧前，
將心比心佢毋肯。

錢穆開：（唱山歌子）

無採真情十萬千，
換來假意冷又冰；
人不為己無可能，
玉雪毋使假神仙。

盧玉雪：（唱山歌子）

九指狀元

此情玉雪記在胸，
此恩不報非英雄；
尊重錢爺如長兄，
拋妻藏嬌無光榮。

錢穆開：講來講去都係若話，無愛同你講了，佢愛直接尋阿緣姨。

△錢穆開氣傍氣鼓下。

梅 香：小姐，錢大爺有舖娘又有子女，歲數又過恁老，你無愛佢，這佢了解，毋過，上擺該個李公子還言討舖娘，人後生又生做緣投，你仰般無愛接受厥个追求呢？

盧玉雪：李公子家世好，前途無量，佢若接受厥个追求，厥爸厥姆定著會反對，就講厥爸厥姆無反對，下二百擺乜會分人恥笑，這實在係對佢盡無公平，佢實在毋願意辜負李公子个一生，不如趕早分手，省使日後雙人感情並並絆絆，顛倒艱苦。

梅 香：小姐，你講恁樣乜著啦，毋過，好个你毋願意辜負人，醜个你又看毋上眼，無斯到底你係愛仰般形个男仔人呢？

盧玉雪：佢這生人無愛麼个人，佢甘願終生服侍佛祖。

梅 香：小姐，這仰般講起呢？

盧玉雪：你跔佢恁久了，敢講全毋知佢个心思？

（唱山歌子）

怨嘆自家命恁歪，
淪落煙花做頭牌；
環境所迫無可奈，
心中苦楚強忍耐。

梅 香：（唱山歌子）

小姐赤腳欠雙鞋，
揀個老公好依賴；
靚嬲美醜無決裁，

九指狀元

實在使人費疑猜。

盧玉雪：（唱山歌子轉雜唸仔）

想起身世頭犁犁，
命運無法自主宰；
萬般委屈放肚底，
唯有青燈佛祖拜。

梅 香：（唱山歌子轉雜唸仔）

小姐原本好金釵，
命運愛靠自安排；
勸娘想法愛遷徙，
千萬毋好去食齋。

△阿緣姨上。

阿圓姨：（唸） 食人飯一口，
還人米一斗；
狐狸莫笑貓，
共樣尾翹翹。

老身，怡紅院老娼頭薛氏單名緣，薛緣就係佢。

內 應：這下正五月節定定，冬節還當久！

阿緣姨：你臭耳聾也毋係？佢哪有講冬節？

內 應：毋係冬節，掙雪圓做麼个？

阿緣姨：孤盲頭你正好！你兜就係愛頂碓佢。佢這「薛緣」係：薛仁貴个「薛」，緣分个「緣」，逐儕都喊佢「阿緣姨」。這下時間既經恁暗了，佢都準備愛睡目了，錢大爺還走來同佢大吵大鬧，講佢花恁多錢，玉雪都無分佢一息息仔个好處，喊佢無論幾多錢一定愛玉雪答應分佢贖身，佢不免來同玉雪勸話一番。來到這就係玉雪个門口，玉雪，佢一個千寶貝萬痛惜親暱个好妹子！

△梅香開門，阿緣姨與盧玉雪相見。

九指狀元

阿圓姨：玉雪，你近來仰會對錢大爺冷淡冷淡？害佢分佢怨嘆到會死；你愛知喔！

錢大爺是偲怡紅院盡重要盡高貴个人客，佢斯得失毋起呢！

盧玉雪：緣姨，你放心！佢並無對錢大爺冷淡，佢還係盡好禮款待伊啊！

阿圓姨：錢大爺係本縣一等好額个人，財高勢大，喝水會凝凍，佢愛麼無？仰般佢愛代你贖身，就係佢愛你愛到像命樣子，你仰毋肯呢？

盧玉雪：佢有同錢大爺講過了，佢係毋願看著佢妻離子散、公婆打壞感情，過同情厥夫人每日暗晡守空房，正會無答應錢大爺个要求。

阿緣姨：哎喲！戇妹子！你盡無簡單正堵著恁好个主顧，過惜你惜到像命根樣子，你若嫁伊，「食用金箸銀碗，著係綾羅綢緞」，一生人榮華富貴；你毋同這隻機會揪畀核，愛等哪央時？你毋好「三揀四擇，擇隻爛瓠杓」，過再講，男仔人有三妻四妾乜盡正常，你毋使掛慮恁多啦！

盧玉雪：男仔人逐儕都係迎新棄舊，從來就係「但見新人笑，哪聞舊人噉」，錢大爺佢今晡日會看上佢，難保另日毋會去愛著別人，佢還係自家一個人過較清閒。

阿緣姨：看來你正經毋聽緣姨个苦勸，（轉氣憤）想著以前，若姆摘等紅紅子子个你，走來同佢苦苦要求講：

（唸撲燈蛾）

這隻細妹屎降下來就無爺，
喊佢代佢畜你摘去這，
順續看有一滴仔銀兩分佢借？
爲了照顧你，
害佢捩捩轉，無日合無夜，
細漢毋係熱著，就係著風邪，
大欸魯夫又盤擎，
如今你全無同佢來感謝。

無想著……（越講越傷心）

（唱老山歌）

九指狀元

若爸一病來身亡，
屋下無錢好安葬；
若姆搨你將門撞，
講愛賣你去治喪。
惜你惜到無像樣，
對你懷著大希望；
毋單靠你來興旺，
望你有日變鳳凰。

盧玉雪：緣姨个大恩大德佢絕對毋會添忘忒。

阿緣姨：哼！還講毋會添忘忒！

（唱老山歌）

如今行事欠思量，
分佢強強會發狂；
得失人客太荒唐，
人財兩失無半項。
佢係經過大風浪，
你就乖乖聽佢講；
毋好對人冷如霜，
趕緊從良正無戇。

盧玉雪：緣姨，你講話就愛憑良心，佢除忒無答應佢个婚事以外，佢斯代怡紅院
賺毋會恁少錢呢！

阿緣姨：這佢知，佢並無同你當做搖錢樹，佢乜係希望你一生幸福啊！

盧玉雪：緣姨，好啦！佢會認真考慮。

阿緣姨：你愛有影正好講喔！

盧玉雪：好！好！好！恁暗了，緣姨趕緊去歇睏了！佢這下還愛準備下隻月初一
去相國寺行香拜佛个東西呢！

阿緣姨：行香拜佛，行香拜佛，一日到夜就知行香拜佛！行香拜佛敢就會飽係無？

九指狀元

阿緣姨先下。

盧玉雪：雪紅，行，慫來去準備行香个東西。

梅 香：是！

盧玉雪與梅香同下，幕下。

九指狀元

第二場 密謀

人物：錢穆開、金博文、歐樹林。

場景：街上到錢穆開宅邸

在街上，金博文、歐樹林上。

金博文：（唱桃花過渡）

三餐鮑魚雞翼胛，
魷魚炒肉薑嫩鴨。
成時無錢好交納，
脫衫脫褲做抵押。

歐樹林：（唱汕頭山歌）

講著食飯兜合合，
這搭嚟忒換別搭；
三餐無肉氣凹凹，
一日少酒目眨眨。

金博文：本大爺，金博文。

歐樹林：麼人毋知你做人真發瘟，報若名啦！

金博文：佢恁好个名，分你講到恁壞聽，聽畀好！吾安做「金博文」，黃金个「金」，
博士个「博」，文章个「文」，你看名仔係毋係盡靚啊？換你！

歐樹林：本少爺，歐樹林。

金博文：看人就知你係夭壽人，正經係：人如其名。

歐樹林：麼个夭壽人，臭耳聾又好叻數。詳細聽！吾喊做「歐樹林」，歐陽脩个
「歐」，松樹个「樹」，森林个「林」，吾个名也毋會恁媿。

金博文：今晡日朝晨，七早八早雞旨未啼狗旨吠，偲个大貨仔錢大爺就差人喊偲
兩個去參詳事情，毋知有麼个大事？

歐樹林：老古人言講：「人心換人心，八兩換半斤」，麼人喊偲愛長透食厥个、啣
厥个、著厥个、搞厥个？

金博文：唉呀，你毋使莫講到恁壞聽，偲係結拜兄弟，有福同享，有難同當，這

九指狀元

乜係千公萬當个啊！

歐樹林：你講了有道理，時間無早，趕遽起行。

金博文、歐樹林下。

幕啓，錢穆開坐在豪華宅邸內。

錢穆開：（唱思戀歌）

田地山排成千甲，
金銀財寶數萬疊；
借錢屋契作抵押，
無錢好還捉來墊。

本大爺，錢穆開，夫人李氏，生有一男一女。講起佢錢某人有三多。

內 白：唱山歌，愛唱三大調平板、山歌子、老山歌，也係小調十八摸？

錢穆開：麼人講佢愛唱山歌？

內 白：你自家講个！

錢穆開：係三多，三樣多，毋係山歌，聽畀好！

內 問：哪三多？

錢穆開：錢濟，屋濟，田地濟；毋係佢佢該嘞雞肱，佢若講第二，無人敢講第一。

前幾日佢要求玉雪嫁分佢做細姐，佢一直尋理由詐生詐死，佢僅可請阿緣姨去做說客，到這下還無好消息傳來，敢怕係過再分玉雪拒絕。一暗晡想該千條路，天一光，本本賣豆腐，還係趕緊喊兩個結拜老弟來參詳，等候半朝晨了，還官看著佢兜來，暫等一時。

金博文、歐樹林上。

金博文：啊！來到這，就係佢大哥个屋下到了，毋使通報，直接入來去。

金博文、歐樹林與錢穆開相見。

錢穆開：你兩儕係毋係三年無洗身啊？

歐樹林：大哥，仰般講？

錢穆開：慢恁多！

金博文：大哥你真真係：老鴉無隔夜卵，性恁急！毋知大哥恁鬥緊喊佢兩兄弟來

九指狀元

有麼个差遣？

歐樹林：係啊！只要大哥有任何困難，佢兩兄弟無論係上刀山也係落油鑊，絕對在所不辭。

錢穆開：若毋係厥大哥佢想無辦法，哪會緊拚拚仔麻煩兄弟來搵手？嘎毋知係爲著盧玉雪个事情，佢一直毋答應嫁佢做細姐，毋知兩位賢弟有麼个計調無？

歐樹林：大哥，你愛想清楚呢！人講：起屋無閒一冬，討舖娘無閒一工，啊若討細姐就愛無閒一生人喔。

錢穆開：三弟，你斷真係：好愁毋愁，愁六月天無日頭！佢並玉雪係愛久久長長，當然也係恩恩愛愛一生人，毋是無閒一生人啦！

歐樹林：大哥，無聽人佢該講：「多牛踏無糞，多人難平分」，「多子餓死爺，多姐無哪好過夜」，你敢毋知厥个意思？

錢穆開：你看佢恁無才調係無？佢自然有法度同大婆細姐安排到好勢好勢。

金博文：大哥莫受氣，三弟係摻你講生趣个，就講，這件事毋知大嫂同意無？

錢穆開：愛講笑，男子漢大丈夫討細姐哪使大婆同意？做你兜盡量想辦法，有事情佢負責，除忒一件事。

歐樹林：哪件事？

錢穆開：做毋得用搶用打，絕對使毋得動著吾心肝仔玉雪个一隻寒毛，過較毋使講圓身有一息半息缺角。

歐樹林：大哥恁樣个條件，該就「鬼打覘公」了。

錢穆開：仰般講？

歐樹林：無法度！

金博文、歐樹林地頭爪耳一陣子。

金博文：（突然）大哥，佢有辦法了，毋知做得無？

錢穆開：講來聽看仔。

金博文：盧小姐敢毋係盡信神？

錢穆開：係啊！每個月初一十五都會去寺廟燒金。

九指狀元

金博文：過聽講佢同宮廟添香油香盡大出手，毋知有也無？

錢穆開：確實有，莫怪佢遽常同佢討錢。

金博文：大哥你想看啊，佢賺个這種錢敢係正正當當个錢，捐分寺廟係大大不敬，
 佢做得唆慫大家同佢責備，過來，還做得煽動寺廟莫接受厥个香油錢，
 分佢無法度佇地方上過再安居落去，到時，佢就會乖乖仔聽大哥个話了。

歐樹林：二貨个，貓公上樹——毋成猴喔，想个計策過當湛，若換做佢，絕對想
 毋出來。

錢穆開：好斯好，敢毋會忒過毒心？佢心肝會毋盼得呢！

金博文：大哥，這係暫時之計，你若毋盼得細雞子做釣餌，哪有法度捉著大鷓婆？

歐樹林：著！著！著！人講「任罵三年，無半點烏青」，保證毋會少一坵肉，這
 辦法好啦。

錢穆開：好，照計進行，毋過，絕對使毋得分玉雪知著係吾个主意。

歐樹林：「啞仔上課」，無問題。

金博文：大哥請放心，你「一句『毋知』，百事了俐」，佢兜一定做到神毋知鬼
 不覺。

三人點頭大笑，幕下。

九指狀元

第三場 行香

人物：性空、悟明、盧玉雪、梅香、金博文、歐樹林。

場景：相國寺山門外至大殿內。

△相國寺山門外，悟明上。

悟 明：(唸) 嘴唸阿彌陀，
心想燉米糕；
一日葷腥無，
完身軟膏膏。

相國寺內一个小沙彌，悟明。奉監寺師父之命，每逢初一十五必須來到山門外歡迎香客，若有特別个貴客愛馬上通報。(遠望狀) 喔！遠遠來个敢毋係盧小姐？趕緊通報監寺師父。

△悟明下。

△性空上。

性 空：(唸) 皈依證三寶，
精修脫六道；
三世報因果，
五蘊本虛無。

貧僧，相國寺監寺，性空。住持師父閉關清修，一切寺務暫時由僱代理。本寺年久失修，因此僱命眾僧四處化緣，準備重建廟宇，再造金身。今晡日乃係初一善男信女參香之期，眾沙彌，有事報僱知情。

△悟明上。

悟 明：啓稟監寺師父，盧小姐已經到山門外了。

性 空：盧小姐是僱个貴客，趕緊敲鐘擂鼓迎接。

悟 明：敲鐘擂鼓，迎接貴客！

△寺廟鐘鼓齊鳴，盧玉雪、梅香手環金香籃上。

盧玉雪：(唱桃花開)

怨嘆自家出差世，

九指狀元

父母無權又無勢；
生命脆脆像黃蟻，
命運如麻到處掖。
世人驚大又欺細，
思想厝糟又憨痴
求神罪惡趕遽洗，
託佛早登極樂界。

梅 香：小姐，相國寺既經到了。

盧玉雪：一同進入。

△盧玉雪、梅香與性空、悟明見禮。

性 空：原來是盧施主，請、請。

盧玉雪：小女子人微位輕，監寺師父用此大禮，小女子實在受毋起。

性 空：盧施主一向虔誠敬佛，時常護持本寺，功德無量，該當受此大禮。請施
主焚香禮拜。

△盧玉雪焚香禮拜，虔誠祝禱。

盧玉雪：佛祖在上，弟子盧玉雪全心祈求：

一願父母早升天國證圓覺；
二願緣姨康健食到老確確；
三願一切眾生離苦又得樂。

性 空：善哉！善哉！施主全無為自家个利益設想，貧僧十分感佩，願施主一生
無惡無毒，得福得祿。

盧玉雪：多謝監寺師父金言，這有三千兩銀票，添作重塑佛祖金身之資。（示意
梅香拿錢）

△梅香拿錢，悟明收下。

性 空：施主上擺正認捐五千兩建寶塔，今日又過捐三千兩重塑佛祖金身，真是
功德無量，阿彌陀佛！

盧玉雪：這係小女子小小个心意，請監寺師父母好棄嫌。

九指狀元

性 空：請施主四處遊賞。

△盧玉雪、梅香出殿門；金博文、歐樹林上；四人相遇。

金博文：恁毋怕見笑，賺食嫖也敢來拜喏，毋驚污染著佛門清淨之地。

歐樹林：就係啊！賺該種个垃圾錢也敢拿來奉獻予師父佢並寺廟，也毋驚雷公響時走毋掣。

△盧玉雪聽著，想愛向前問清楚，梅香遽遽拉等，兩人同下。

△金博文、歐樹林進入大殿。

金博文：監寺師父，頭下堵著盧玉雪來參香，像這種賺食嫖，哪好分佢入來寺廟參拜呢？

性 空：世人生而平等，無應該分麼个身份。

紀清池：監寺師父，盧玉雪賺該種無淨俐个錢，敢使得奉獻到偲寺廟？敢毋會對佛祖無尊敬？

性 空：只要厥个心肝想法係淨俐个，不管錢个來源係麼个，全部做得接受。

金博文：譬論講：今晡日有一個刷人放火个強盜來捐錢，這種个錢偲寺廟敢做得收呢？

性 空：佛曰：「放下屠刀，立地成佛」。只要一個人肯停止積惡，佢就會得著種種个福報，脫離六道輪迴，甚至成佛。

歐樹林：佢還係無贊成監寺師父這種个做法，監寺師父若堅持愛收這種垃圾錢，從今以後佢兜就無愛過捐獻了。

性 空：施主仰會如此偏執！也罷，佢將盧小姐錢提去修建便所，如何？

歐樹林：修建便所？嗯，眾人屙，眾人滂，恁樣乜較差毋多！還有，寶塔面頂有題盧玉雪个名，恁樣，豈毋係會遺臭萬年呢？

性 空：既然施主如此計較，不如佢將盧施主个名除忒，換做「無名氏」，你看仰般？

金博文：監寺師父明斷，多謝師父大開方便之門，佢兜就等候佳音囉，告辭。

金博文、歐樹林下。

性 空：(唸) 世人多浮華，

九指狀元

行善全係假；

迷痴像蛤蟆，

艱苦若擎枷。(搖頭)

△性空、悟明下，幕下。

九指狀元

第四場 逼婚

人物：盧玉雪、梅香、錢穆開、金博文、歐樹林。

場景：錢穆開宅邸。

△幕啓，錢穆開上。

錢穆開：（唸）自家一人獨主張，

毋當兩人共思量。

前幾日喊兩位賢弟去辦玉雪个事情，實在倚恃毋得，仰般到這下還不見回報？使催心內十分不安。

△金博文、歐樹林上。

金博文：（唱溜鳥歌）

一人煩惱有一樣，

逐儕煩惱無相像；

燈盞少油火毋光，

陂塘淺水魚難養。

歐樹林：（唱溜鳥歌）

鳥仔一隻捉佇手，

較贏十隻歇在樹；

千年田來八百主，

耕無三年嫌艱苦。

金博文：大哥命偲辦个事情，既經辦了差不多了，趕緊來去回報，免得大哥目金
金仔緊看。

歐樹林：順續仔看有好加減檢兜食無？啊！到了，毋使通報，直接進入。

△錢穆開與金博文、歐樹林相見。

錢穆開：兩位賢弟，交代你兜辦个事情毋知辦了如何？

金博文：催昨晡日佇廟項堵著玉雪小姐，催兜有用話同佢堵。

錢穆開：（發譴，大聲）你實在還大膽，玉雪係你未來个大嫂呢！你敢用話同佢
堵堵撐撐？七月半个鴨仔，毋知死！

九指狀元

歐樹林：大哥，你莫恁受氣啦，佢兜係真戲假做，無佢仰會乖乖仔答應嫁分你？

著無？

錢穆開：著！著！著！佢一時毋記得這係佢兜个計謀，續下去講！

金博文：佢講佢，賺食嫲也敢去佛門淨俐个所在拜喎。

歐樹林：佢過講伊，該款垃圾錢也敢拿去奉獻予寺廟並師父。

錢穆開：（強忍怒氣）你兜實在還毒腸利手啊！

歐樹林：大哥，壞人分佢兜做，新人正分你做啊。

金博文：毋單淨恁仔啲！佢過同寺廟个監寺講，使毋得分像盧玉雪這種無淨俐个人入廟參拜，乜做毋得接受無淨俐个錢；監寺也答應愛同寶塔面頂捐獻芳名中，將盧小姐个名仔改做無名氏，過同盧小姐捐愛重塑金身个錢拿去起便所。

歐樹林：還有，佢過各處同人宣傳盧小姐無淨俐，用垃圾錢添油香；今這下，逐儕聽著盧小姐个名仔，也係見著盧小姐个人都緊呷口涎。

錢穆開：雖然毋盼得係毋盼得，毋過，想著做得並玉雪長長久久，佢就忍耐一站仔。兩位賢弟，你兜看佢哪久正使得去同玉雪提親？

金博文：佢看今晡日就使得去了。

錢穆開：恁鬥緊？敢毋會食忒遽打爛碗？

歐樹林：大哥，人講：「揀日不如撞日」，今晡日來去好啦。

錢穆開：好，共下來去提親。

△錢穆開、金博文、歐樹林下；幕下。

九指狀元

第五場 斷指

人物：盧玉雪、梅香、錢穆開、金博文、歐樹林。

場景：怡紅院盧玉雪房內

幕啓，盧玉雪、梅香在房內悶悶不樂。

梅 香：小姐，自從你對相國寺轉來了後就悶悶不樂，食睡毋得，若繼續恁樣落去，若个身體仰會堪得？

盧玉雪：想著該日金博文並歐樹林講个話，佢越想就越悶，雖然佢出身佇卑賤个所在，雖然佢係一個殘花敗柳个人，毋過，敢就使毋得做善事？敢就愛分人糟躉到恁工夫？

梅 香：小姐，老古人言講：「麼个藤結麼个瓜，麼个人講麼个話」，彼兩個人講个話若聽得，狗屎就食得，你莫放佇心肝肚，無斯會譴死驗無傷喔。啊！著啦，小姐，佢最近佇外背有聽著盡多人客講起若个事情，毋知好講也毋好講？

盧玉雪：妳這隻細妹鬼仔，有麼个事情，還毋趕遽講出來？

梅 香：小姐，係你愛佢講个喔，你聽著使毋得受氣呢。最近逐儕都佇該講小姐你無應當去廟項拜喏，因為你圓身無淨俐；過講你使毋得捐錢分廟項，因為你賺个錢係垃圾錢。

盧玉雪：這一定係佢兩儕佇該濫糝造話，正會一嘴傳一嘴，傳到恁壞聽，莫怪這幾日仔有兜人客看著佢毋係冷冷淡淡，就係話中帶笏同佢啣洗。

梅 香：毋單淨恁樣，佢兜過講，小姐你有捐錢愛做寶塔，毋過，竟然寶塔無題小姐个名，伸著一个「無名氏」定定，講係小姐你無資格題名，驚怕遺臭萬年；也無想小姐係上下二港盡出名个才女，麼人毋知？哪個不曉？仰般會變做無名氏，正經譴死人！還過有啦！聽講監寺師父愛同你重塑佛祖金身个錢拿去起便所呢。

盧玉雪：（譴到齧牙狃齒）麼个啊？連寺廟也同佢做對，真真豈有此理！

梅 香：小姐莫受氣啦，恁慢慢仔了解到底係麼个原因，正定定仔來想辦法。

盧玉雪：只好如此。

九指狀元

錢穆開、金博文、歐樹林上。

歐樹林：大哥，怡紅院到了。

錢穆開：直接入來去。

盧玉雪、梅香、錢穆開、金博文、歐樹林相見。

盧玉雪：原來係三位大爺，請坐。梅香，奉茶；過吩咐裡背準備酒菜。

梅香奉茶。

盧玉雪：毋知三位大爺來怡紅院係愛唱歌也係愛聽曲，或者係愛看舞？

錢穆開：佢兜毋係愛唱歌乜無愛聽曲，更加毋係愛看跳舞？

盧玉雪：該就奇囉，無愛唱歌聽曲，無愛看舞，敢還有別項事情？

錢穆開：佢今晡日係愛來同你提親个。

盧玉雪：錢大爺你恁愛講笑，佢前無幾久正同你講過忒，毋使考慮，你仰會毋死心過來提起此事？

錢穆開：玉雪，你仰會情恁寡？敢無愛過考慮一下？

盧玉雪：佢心意已定，你過再仰般講，佢定著毋會回心轉意。

錢穆開：（見笑轉受氣）盧玉雪！你毋比頭擺，這下你既經無值錢了，死豬肉過想愛起大價，祭衰人！

盧玉雪：錢大爺，你講這句話係麼个意思？

錢穆開：麼个意思？你還毋知个款，佢坦白摻你講，外背个人同你講到已壞聽了，你知無？講你無淨俐个身份也敢去廟項拜喏，垃圾錢也敢拿去寺廟奉獻。

盧玉雪：哦！佢知了，該日金爺、歐爺同佢講个乜係恁樣个話，原來你兜係蛇窿透蜴窟，過還有，（突然轉身面對金博文、歐樹林）你兩個並監寺嘴咬耳公，係毋係佢該講吾个壞話？

金博文：並佢兜無相干，這兜都係佢兜佢外背聽來个。

歐樹林：係啊！騙佢你會死！

盧玉雪：你講麼个？

歐樹林：毋係啦，騙你佢會死。

九指狀元

錢穆開：你如今既經身敗名裂了，佢看你還係咩好嘞！

盧玉雪：錢穆開！你、你，你還毒心啊，原來這都係你兜個詭計。人講：「人帶面目樹帶皮」，你無愛面子，佢還愛呢！

（唱緊中慢）

聞言玉雪全明瞭，
原來係你古董刁；
挖隻窟仔逼佢跳，
害佢名聲壞了了。
正經同講無花撩，
做人細姐佢毋曉；
積惡小心著天鈞，
毋使食飽來換枵。

錢穆開：佢正經係「珍珠分你當做老鼠屎」！

（唱老山歌）

真情對你日月昭，
顛倒罵佢恁使梟；
勸你毋好驚見笑，
趕遽嫁佢做佳偶。
鯽魚嘴來黃蜂腰，
看著強強會發媯；
頭甸羅帕坐花轎，
金屋藏嬌樂逍遙；

盧玉雪：錢大爺，你正經係執迷不悟，也罷，佢送你一項東西。

錢穆開：愛送佢東西，仰恁好空呢？係麼个東西？

盧玉雪：你等一下就知。梅香，你也佇這等。

盧玉雪入內，眾人佢看你、你看佢。

金博文：大哥，你這滿發死了，一定係麼个定情之物，親像係手巾仔啦，也係耳

九指狀元

環手鉞。

歐樹林：毋著，毋著！佢揣係肚搭仔，無就係底衫仔，恁樣毋正較貼心肝。

錢穆開：好了，好了！莫佇該閒話一大堆，正經無一撇。咦？哪會恁久還旨出來？

梅香，你入去看仔好無？

梅香：小姐無喊，佢毋敢入去。

盧玉雪復出，面色白琢琢仔，額頭緊流冷汗，痛苦難當，左手纏一條手巾仔，右手拿等一個紅綢包。

盧玉雪：錢大爺，你無非就係欲愛佢青春个肉體，佢這下就同吾个肉體分你。

盧玉雪將紅綢包拿分錢穆開。

錢穆開接過紅綢包，打開一看，一時發痴驚，趕遽擲掉。

歐樹林拈起來一看，著一驚，黏時拂分金博文，金博文承起來，詳細看一遍。

歐樹林：（指等金博文手項个紅綢包）阿母哀！係手指尾啦，血漬漬仔，還驚人喔，發瘟仔，你毋驚吓？

金博文：夭壽人，你就係惡人無膽啦！盧小姐，你恁樣何麼死苦呢？大哥，既然盧小姐固執如此，佢看這件事，你就放佢煞啦。

錢穆開：無下棚，仰結煞？唉！這下破樵連頓頭乜續破，正經分佢講對對，缺一隻角，少一坵肉了啦，心肝仔玉雪！都係你兩個做得來！行啦，來轉！
（嘆息搖頭）

金博文：這個東西佢兜毋敢收，你兜拿轉去。

金博文將紅綢包拿分梅香，錢穆開、金博文、歐樹林下。

梅香：小姐，你有要緊無？你何苦愛恁樣做呢？

盧玉雪：佢無要緊，大家都對佢去廟項指指點點，就連佢捐愛重塑金身的錢也拿去起便所，佢敢正經係恁垃圾个人呢？

（唱下南山歌）

爲何寶塔無名姓？

心內暗暗發痴驚；

九指狀元

出身卑賤人看輕，
怨嘆自家恁歪命。
眾人講到恁歹聽，
全然無顧吾名聲；
夭壽發瘟又發冷，
害得弱女跌深坑。

梅 香：佢兜全部係目珠看高無看低、自命清高个人，莫插佢兜啦。

盧玉雪：（唱天涯歌女）

監寺做事還發病，
全無主張留話柄；
拜託佛祖來點醒，
保庇孤單个形影。
人靚毋當運命靚，
這時自家愛硬頸；
愛罵監寺死青瞑，
講道論理拚輸贏。

梅 香：小姐，等你手若較好，正來去相國寺，看該兜和尚恁般講？

盧玉雪：毋使等手好，這下就來去。

梅 香：小姐，你就係恁急性啦！佢先同你搽藥仔啦。

梅香強拉盧玉雪下，幕下。

九指狀元

第六場 自絕

人物：性空、悟明、盧玉雪、梅香。

場景：相國寺

幕啓，性空在大殿內參禪。

性 空：(唸) 萬法唯心造，

三界皆識導。

貧僧，性空。前因盧施主捐錢重塑金身个事情，多位善男信女有意見，使貧僧十分爲難，只好將用途移做他用，想來功德應當係無兩樣，諒必盧施主毋會計較正著。今日閒暇無事，且等一時。

悟明上。

悟 明：(唸) 百姓爲錢勞，

六畜因食餓。

小沙彌，悟明。報告監寺師父，盧小姐既經來到山門了。

性 空：有請。

悟 明：有請盧小姐。

盧玉雪、梅香上，與性空、悟明見禮。

性 空：盧施主今晡日毋係初一十五，爲何如此發心來寺參拜？

盧玉雪：佢今晡日佢毋係欲來拜佛祖，係專工愛來尋你算數个！

性 空：盧施主有話定定仔講，貧僧洗耳恭聽。

盧玉雪：佢舊年有認捐做寶塔，仰般寶塔面頂獨獨無題吾名？係毋係嫌佢出身低？也係嫌吾个錢無淨俐？

性 空：眾生都係平等个，身份也無分貴賤，這係面對有兜仔無理解个信士个意見，貧僧不得已所做个權宜之計；佢想盧施主係一個明理之人，應該做得當接受正著，過再講，萬物皆係空，名利本虛無，盧施主毋使執心佇有題名也無題名這件事面頂。

盧玉雪：別人个話，你就當做金言玉語來考慮，吾个感受，你哪無代佢想看仔呢？

性 空：施主若堅持講貧僧个做法毋著，貧僧願意承認，乜甘願向施主會失禮。

九指狀元

盧玉雪：這件事且按下，佢過問你一件，仰般佢愛捐做爲佛祖重塑金身个錢，你同錢拿去起便所？分明係嫌吾个錢無淨俐，做毋得用佢佛祖个金身面頂。

性 空：塑金身係外表光彩，起便所係分眾人方便，不管是塑金身也是起便所，其實功德都係共款恁大，只要你莫起分別心，就毋會感覺心內無平靜了。

盧玉雪：這係你个花言巧語，佢哪會隨便就聽信若个話呢？

性 空：佢勸施主絕對毋好執性，該放下就愛放下，恁樣正會自在。

盧玉雪：麼个執性、放下、自在，佢都聽無啦！

性 空：敢講佢同你會失禮你也毋肯原諒貧僧？

盧玉雪：佢死乜毋會原諒你！

盧玉雪講完就往龍楯撞，氣絕身亡，眾人搶救不及。

梅 香：（開聲大噉，目汁闌干）小姐，你死了忒毋值了，你做麼个恁戇呢？正經係靚人無靚命。（止噉，大聲罵）喂！野和尚！臭和尚！今這下這件事愛仰般排解正好？

性 空：盧施主既然佢這自殺身亡，佢就有責任同佢處理好勢，盧施主佢慘死在外，上無父母，下無子孫，還旨出嫁，不如交代本寺同佢安葬，四時年節頌經服祀，小施主你看如何？

梅 香：暫時就照恁樣，佢這下愛轉去通報媽媽緣姨知情，看緣姨仰般講，有同意無？順續準備祭拜東西，你兜愛細心細意做功德，無斯，佢並吾媽媽絕對毋會放過你兜。啊！著啦，吾小姐前幾日因爲錢穆開逼婚，故所同自家个手指尾剃下來分錢穆開，表明無愛順從之意，請你兜同指頭尾共下安葬吧。

梅香對手袖裡肚拿出紅綢包交予悟明。

性 空：小施主放心去吧。

梅香下。

性 空：悟明，你同知事師叔講：好好同盧施主收埋，過做一場噉口法會，普降甘露，施食餓鬼，離飢脫渴，拔幽冥眾生之苦，滅冤親債主怨恨之火，

九指狀元

願亡者消除業障，往生淨土。

悟 明：遵命。

性 空：慢！你過交代知事師叔將盧施主个手指尾本本用紅綢包等，然後囿佇偏殿棟梁之上，接受人間香火个薰陶。

悟 明：請問監寺師父，仰般愛恁樣做呢？

性 空：天機不可洩漏，速速進行就是。

悟 明：是。

悟明下。

性 空：(唸) 佛法不可靠，
輪迴難脫逃；
唯有勤修道，
正能避災禍。

阿彌陀佛。

性空下，幕下。

第七場 投胎

人物：閻羅王、盧玉雪魂、判官、牛頭、馬面、黑、白無常、眾鬼役、眾鬼魂。

場景：幽冥路上至森羅寶殿，陰森黑夜。

幕啓，幽冥路上，地獄之中，出現盡多鬼役拖著鬼魂執行上刀山、下油鍋、拔舌頭、抱銅柱、用石磨、用臼舂、使刀鋸等酷刑，哪都係鬼哭神號。

黑、白無常拘拿盧玉雪魂上。

盧玉雪：（唱陰調）

無恥小人將僱誤，
滿腹怨氣麼儕訴；
急死嬌娥全無助，
害僱一命來嗚呼；
坎坎坷坷黃泉路，
所見景象恁恐怖；
想著被刑身痛苦，
不該淺想悔當初。

好驚人啊！

黑、白無常，盧玉雪魂下。

森羅寶殿內，判官、牛頭、馬面上。

判 官：（唱福路平板）

閻王半夜收若命，
絕對毋留到五更；
奉勸世人愛覺醒，
善惡終報盡公平。

牛 頭：（唱福路平板）

盡多世人若青睞，
爲非作歹像畜生；
毋輸蛤蟆踎古井，

爲名爲利相賽爭。

馬 面：(唱福路平板)

慾望可比無底坑，
日夜勞碌半條命；
食睡毋得兼破病，
正經像個戇百姓。

判 官：各位好兄弟請了，閻王不久就愛升殿，你我在此侍候。

閻羅王上。

閻羅王：(唸) 陰曹地府在酆都，
森羅殿上我稱孤；
判官手執生死簿，
賞善罰惡絕不誤。

孤，地獄之主閻羅王。在幽冥教主地藏王菩薩駕前，專司生死罪福之業，主守十寒八熱地獄。凡鬼魂有心不甘、情不願、捨不了、放不下之事，皆可來此投訴，由本王公平審理。眾鬼卒！有事來奏，無事退朝。

小 鬼：報！黑、白無常帶領盧玉雪魂魄前來投訴。

閻羅王：帶上來。

黑、白無常帶盧玉雪魂魄上，佇遠處喊冤而來。

盧玉雪：罪魂盧玉雪拜見閻羅天子。

閻羅王：免禮，盧玉雪有何冤屈？一一奏來，本王爲你做主。

盧玉雪：罪魂雖然出身卑賤，毋過係一心向善，從來毋識害人，還過係輒輒去寺廟參香禮佛，供養師父，奉獻錢財，起寶塔、塑金身，仰般世人全毋瞭解？顛倒轉來恥笑吾个錢無淨俐，百般侮辱係，講吾个壞話，使得係見笑含恨磕頭自殺身亡，請閻羅天子爲係主持公道。

(唱五更鼓)

眾人嘍嘎伯勞嫻？

分佢想著真可怕；
毋是自家腳踏差，
何必無情來咒罵。
無恥小人真奸詐，
一日到暗講閒話；
行爲舉止惡霸霸，
也毋驚怕雷公打。

閻羅王：正經有這款事情？你過詳細講來。

盧玉雪：（唱慢平板）

重塑金身錢毋罇，
全部無分佢參加；
將錢他用恁花假，
和尚仰會情恁寡？
滿腹見笑嘴啞啞，
譴到強強愛爆炸，
寺廟欺佢婦人家。
無顧面子來舞射。

閻羅王：盧玉雪，你一生向善，可喜可嘉，毋過，你不應該用激烈个手段結束自家个生命，自殺無法度解脫任何苦惱，苦惱係因爲你過去个惡業報在當下，當下時機成熟，理應受著苦報，唯有報盡，苦正會盡，你這下報還旨盡就來自殺，下生人共款愛受報。

盧玉雪：敢講該兜罵佢个人就毋係造業？

閻羅王：各人造業各人擔，佢兜自然有佢兜个報應。

盧玉雪：若恁樣，佢應該仰般做正著？

閻羅王：你應該愛真心懺悔你過去个業障，終有一日定著會業消福至。毋過如今太慢囉！等出過世正講！按照律法，本應將你關在枉死城受苦，念你有供佛个大功德，本王判你下生人出世爲男身，生在富貴之家，長大以後

高中狀元；毋過，你係毋係做得脫離魔障，愛看你今後个所作所爲，才有法度決定，你好自爲之吧。

盧玉雪：感謝閻羅天子開恩。

閻羅王：判官，餘事你去處理。

閻羅王下。

判官：牛頭、馬面將盧玉雪帶去投胎轉世。

牛頭、馬面、黑、白無常帶盧玉雪下，判官吊場。

判官：善來此地心無愧，

惡過我門膽自碎；

樂善好施命富貴，

爲非作歹著天雷。

判官下，幕下。

九指狀元

第八場 赴考

人物：馮志遠、馮夫人、馮文彬。

場景：馮府

△幕啓，馮志遠、馮夫人在廳堂之上。

馮志遠：（唱平板）

家財萬貫少遺憾，
人丁單薄盡淒慘；
鋪橋做路無虧欠，
求神託佛拜尼庵。

馮夫人：（唱山歌子）

上天慈悲有靈感，
老蚌生珠得一男；
兜屎兜尿苦無嫌，
痛惜憐愛像糖甘。

馮志遠：老漢，馮志遠。

馮夫人：妾身，吳氏。

馮志遠：廣東梅縣人氏，想偕夫妻結髮二十餘年，無降一男半女，係偕兩公婆日夜求神託佛，實在萬幸，後來總算降下一子，安名文彬，自細生得眉清目秀，聰明伶俐，知書達禮，想當初父老子細，如今已經十八歲長大成人了。

馮夫人：這係老爺你平日鋪橋做路做好心所得來个福報，上天正會賞賜分個恁好个俖仔，只不過有一息仔缺陷……

馮志遠：你係講文彬降落來左手就無手指尾，偕毋係同你講過，該係床公婆做記號，個文彬係床公婆个心肝契子，夫人毋使掛意。

馮夫人：人講床公婆做記號係講「胎記」，哪有床公婆恁狠，共俖仔个手指尾剝斷呢？偕看一定係偕有身項个時節佇眠床頂擊剪刀所致，害個文彬破相，喊佢以後愛仰般做人？

九指狀元

馮志遠：夫人，僂從來毋識做過虧心事，上天絕對毋會同僂責罰，過再講，「兒孫自有兒孫福」，你看，文彬細漢毋係盡好畜養？大漢生得一表人才，書過讀了恁好，先生一直阿謔僂文彬滿腹經綸，才思敏捷，出口成章，下筆成文，下二擺絕對有出息。

馮夫人：老爺你恁樣講，僂做得開懷放心了，啊！講著讀書，昨晡日先生有講，三年一科个大考佇今年秋天並明年春天舉行，喊文彬一定愛去應考，無定著今科有機會奪魁。

馮志遠：著啊！僂仰恁無記才，你無講，僂差一息仔就添忘忒，既然如此，不免喊文彬出來參詳一下，文彬僂兒何在？

△馮文彬、阿福上。

馮文彬：來了。

（唸）聽著父母喊一聲，
趕緊答應入大廳。

阿 福：（唸）老爺喊一聲，
進前問一番。

△馮文彬、阿福拜見兩老。

馮文彬：拜見父母大人，不知爹娘喊兒出來，有何事情教訓？

馮志遠：講來也係大事一件，這關係著僂兒个一生人，昨晡日先生有講，三年一科的大比今秋就愛舉行了，喊你一定愛去應考，僂个想法也係並先生共款，毋知僂兒意下如何？

馮文彬：爺娘單生文彬一子，辛辛苦苦同僂撫養長大成人，如今爺娘既經年過六十，正係文彬報答爺娘養育之恩个時節，仰能離開爺娘去求取功名呢？聖人曰：「父母在，不遠遊」。僂甘願服侍爺娘到百年歸壽。

馮夫人：老爺，你有聽著無？實在還感心啦，僂想，不如先分文彬討舖娘來照顧僂兩老，下二科正去赴考，你看仰般？

馮志遠：噯，哪有先小登科正大登科个道理？文彬，僂知你真有孝，毋過細俵人應該愛志在四方，讀聖賢書就愛安邦定國，貢獻社會，造福百姓，哪使

九指狀元

得屈守家門，平凡過了一生？你若正經有孝就愛赴考，毋單淨愛赴考，過愛考頭名轉來。

馮夫人：老爺，你也莫爲難僂文彬，有去考就好，無一定愛考頭名。

馮文彬：既然爺娘愛兒去赴考，兒不敢不從，只是爺娘年紀老邁，身體無盡砸礮，兒無佇兩老圓身邊，仰能放心得下？

馮志遠：你儘管去無要緊，屋內有眾多奴才女婢好使喚，做你放心。

馮夫人：俵仔，你就所費加帶兜仔，百項事愛細義小心，一路之上，逢店歇暍，遇廟寄雨，會寒你就愛加著兜衫，會枵你就愛加食兜飯。阿福，你並若少爺共下去，你愛好好照顧少爺。

阿 福：小人曉得。

馮文彬：爺娘放心，文彬既經大人種了，曉得照顧自家，僱一定奪魁轉來，以慰雙親。

馮志遠：好！好！你並阿福先去準備行李包袱文房四寶，等候良時吉日上京赴考。

馮文彬：子兒遵命。

△沈文彬、阿福下。

馮夫人：文彬對細漢起從來就毋識離開屋下恁久，這下一時愛離開，僱實在盡毋盼得又過盡擔心呢。

馮志遠：夫人，文彬若係得魁轉來，該係仰般光宗耀祖、顯親揚名个一件事你敢知？你愛歡喜毋正著！過再講，一隻千里馬，你同佢絢佇將軍柱，對僂文彬敢毋係忒過克虧呢？

馮夫人：見講乜係你著！到時文彬若做大官也係去分人招，三年見無一面，你正會知苦！

馮文彬：（唱平板）

文彬生做棟梁材，
考個狀元像食糜；
石頭無滾生溜苔，
出外正知僂厲害。

九指狀元

馮夫人：（唱平板）

僱知俵仔係天才，
毋當屋下孝爺哀；
另日做官走天背，
十年八載無轉來。

馮文彬：好了，好了，偲兩儕你一句僱一句，公講公有理，婆講婆有理，不如「早
眠早睡，降子傳代」。

馮夫人：無愛摻你講欸啦！

△兩老下；幕下。

第九場 重逢

人物：馮文彬、阿福、馬伋、儀仗隊伍、性空、悟明。

場景：京城大街、相國寺。

幕啓，狀元馮文彬身穿紅袍，頭插金花，腳跨駿馬，金鞍玉勒，馬伋執轡，前有鑼鼓喝道，後有旗幡儀仗，風風光光奉旨遊街三日。

馮文彬：（唱緊中慢）

十年寒窗無人問，
一舉成名天下聞；
獨佔鰲頭稱才俊，
赴宴瓊林見明君。
懸梁刺股今出運，
鯉魚一躍上龍門；
報效國家守本分，
發揮長才定乾坤。

本官，馮文彬，乃今科狀元，皇上欽賜御酒宮花，跨馬遊街，今晡日係第三日，來人，摧馬前行。

△沈文彬等下；

△相國寺大殿，性空上。

性 空：（唸） 逆來順受性愛忍，
萬法歸一心爲本；
執心忒重自我困，
狀元前身乃女坤。

貧僧，相國寺住持，性空。年前，住持師父圓寂，眾師兄弟舉荐偈擔任住持之職。今日清早起來，感覺心肝頭搵搵，無知麼个緣故？待偈屈指一算，啊！原來是九指狀元到來，唉！想起二十年前這件公案，一直砢佇吾个心頭，今日總算做得同佢了結了。知客悟明何在。

△悟明上。

悟 明：（唸）住持話出脣，

麼人敢不遵？

知客僧悟明參見住持師父，毋知喚出弟子，有何事情吩咐？

性 空：爲師算出今晡日有一位貴客光臨本寺，你趕緊準備迎接。

悟 明：毋知係麼个貴客？

性 空：乃是九指狀元。

悟 明：九指狀元？

性 空：你只要對佢講：「九指狀元，爲師等候多時了。」其他毋使加講，隨後自然明白。

悟 明：是，下背聽者：準備迎接九指狀元。

△馮文彬等上。

馮文彬：咦？來到此地，怎樣感覺面熟面熟？

阿 福：少爺，也無火燒豬頭皮啊，哪會面熟面熟？

馮文彬：扯！不可胡言亂語！這到底係麼个所在？

阿 福：稟報少爺，此地係京城第一名寺，相國寺。

馮文彬：喔！原來係相國寺，此寺乃是千年古刹，一定愛去參拜一番才著。來人，下馬入寺參拜。

阿 福：所有人馬在此歇暍，狀元爺入寺參拜。裡背可有知客僧？請通報住持：狀元爺入寺參拜。

悟 明：原來是九指狀元駕到，小僧並住持師父恭候多時了，請等一時，待僮通報，住持馬上出迎。來人，敲鐘擂鼓，迎接狀元爺。

△相國寺敲鐘擂鼓，性空出迎，與沈文彬相見。

性 空：狀元爺駕到，有失遠迎，當面恕罪。

馮文彬：那裡，那裡，來得突然，未先通報，請莫見怪。

性 空：請狀元爺入寺參拜。

馮文彬：住持請。

△沈文彬、阿福、性空、悟明一同入寺。

△阿福拉住沈文彬。

阿 福：少爺，頭下該個和尚哪會講你係九指狀元？

沈文彬：佢乜感覺奇怪，等一下正同住持問畀清楚。

性 空：狀元爺請上坐。悟明，上茶。

馮文彬：多謝住持，同坐。

△悟明上茶。

性 空：狀元爺才高八斗，學富五車，滿腹經綸，下筆成章，令人敬佩。

馮文彬：住持師父不插紅塵，也知朝廷科舉之事？

性 空：自度度人，方能成佛；出世入世，總歸一心。權變救苦，方便結緣；上求佛道，下化眾生。去留紅塵，何須執心？出家人關心世俗之事，也無不可啊！

馮文彬：住持師父佛法無邊，弟子愚痴，實在無法參透。弟子有幾事不明，想愛請問住持師父。

性 空：狀元爺但問無妨，貧僧知無不言，言無不盡。

馮文彬：方才弟子對寺外經過，感覺此地有兜仔面熟，好親像哪央時識來過這，又好親像仔夢中見過共樣，連住持你，佢乜感覺面熟面熟；毋過，這個感覺卻係無已真實，毋知係麼个道理？

性 空：狀元爺，這都係因為「藏識」个緣故。

馮文彬：藏識？「藏識」係麼个東西？

性 空：藏識就是因仔圓身也係心內个識，藏識係偲人真真正正个本性，佢會跔偲輪迴五趣六道，永遠毋會消滅。就像添樵燒火，樵燒了一枝又一枝，毋過火猶係火，一直著等下去。你前世人做麼个業，不管係善係惡，等到後世人，只要因緣成熟，就會報應。狀元爺前世人一定識來此地，才會有似曾相識个感覺。

馮文彬：住持師父，講了有道理，毋過佢還無法度完全了解。

性 空：不瞞狀元爺，狀元爺个前生系一位女子，因為虔誠禮佛，供養寺廟，功德甚大，因此投胎轉世為男人，更加高中狀元。

馮文彬：這敢斷真？佢毋信有這款个事情。

性 空：千真萬確，狀元爺若毋信，佢講一個故事：二十年前有一个員外合意著一个煙花女子，想愛討佢入門做細婆，因為這個煙花女子毋願破壞別人个家庭，同員外拒絕，員外毋死心，用盡千方百計逼佢一定愛嫁。悟明，詳細情形你講分狀元爺瞭解。

悟 明：是！

悟 明：狀元爺，你敢對佢一息仔印象都無？莫怪啦，二十年前佢係一個小沙彌，二十年後變做一個知客僧，既經轉大人了，莫怪狀元爺毋識佢，請狀元爺聽好勢來。

（唸撲燈蛾）

員外到處造謠言，
講佢出身盡卑賤；
雖然生做若天仙，
不得拜佛入大殿；
嫌佢賺錢染臭蕘，
毋准廟項去捐獻；
害佢見笑失體面，
親像啞狗食黃連；
員外趁勢逼姻緣，
憤慨剝指表心田。

△馮文彬大驚失色，不由得右手去摸左手。

性 空：無毋著，因為這個煙花女子毋甘願分人講佢拿無淨俐个錢去供養寺廟，寺廟過同佢愛重塑金身个錢拿去起便所，還有佢捐獻有著个寶塔面頂，無題厥个名，故所，佢譴到奈毋得，走去寺廟理論，佢對所得著个答覆並無滿意，一氣之下，磕頭而亡。

馮文彬：這同佢有麼个關係？

性 空：狀元爺慢慢聽佢落去，當時寺廟个監寺同情該位煙花女子，替佢收埋，

為著愛留下公案，監寺正同該位煙花女子左手个手指尾留下來另外收藏。

馮文彬：（暗想）這、這、這……，莫非佢喊佢九指狀元是這個原因，無可能啊，廣東離這幾下千里，就講佢故鄉，乜無幾多儕人知佢降下來只有九隻手指。

性 空：狀元爺！若个前世人正係該個煙花女子，狀元爺若毋信，請出示左手一觀。

△馮文彬慢慢擎起左手，看等失去手指尾个左手，一時失神呆呆。

性 空：狀元爺，這係你對剝忒手指這件事念念不忘，藏識就同佢清清楚楚記下來，等你投胎出世時就伸九隻手指了。

△馮文彬慢慢回神過來。

馮文彬：（唱散平板）

莫怪感覺舊地遊，
聞言性命強會休；
前生竟然係女流，
使佢煩惱心擔憂。
果然手指伸著九，
為何如此欠研究；
望師指點佢懇求，
免得心內疑問留。

性 空：（唱老山歌）

若無佛祖來庇佑，
到今還佇水底泅；
全靠閻羅來解救，
分你如今有成就。
前生執性命無久，
人生才會變烏有；

勸你放下莫怨尤，

歡喜做來甘願修。

馮文彬：這一切就像發夢共樣，使佢茫茫渺渺，渺渺茫茫。

性空：看來狀元爺對這件還半信半疑，貧僧拿一項東西分狀元爺看了後，狀元爺絕對會相信正對。

馮文彬：一直到頭下為止，佢今晡日所堵著个事情都係十分奇怪，既經使佢尋無頭腦了，敢猶有較奇妙个事情？

性空：悟明，命人將偏殿个棟梁面頂該隻紅綢包取落來。

悟明：遵命。

△悟明下，再上時手拿一隻紅綢包交分性空，性空接下紅綢包，慢慢打開。

性空：請狀元爺看畀真來。

△當紅綢包完全拍開个時節，沈文彬一看仔著，使佢發痴驚，嘎來失魂倒地；眾人趕遽同馮文彬救醒。

馮文彬：好驚人啊！

性空：狀元爺頭下仰會失魂不醒？

馮文彬：一看著該枝手指，佢腦海當中感覺盡像係吾个手指一般。

性空：狀元爺毋使著驚，還有更加神奇个事情，請狀元爺个左手借貧僧一下。

△性空將紅綢包裡肚个斷指接佇馮文彬左手手指尾个所在，斷指並手掌接到微蒙微蒙；馮文彬看到眼睛睛仔。

性空：請狀元爺左手手指尾停動看仔。

△馮文彬將左手手掌搭俾來、打開，又過同手指尾動了過再動。

馮文彬：哎呀！奇哉！妙哉！

（唱月有情）

眼看斷指變完善，

毋止會直過會彎；

自由停動又美觀，

右手一比全共款。

分僱一時毋習慣，
總算十指不分散；
內心溫暖雪中炭，
住持神通人稱讚。

住持師父真是神機妙算，神通廣大，弟子十分敬佩。

性空：這喊做「今世做，後世收」。當初因為煙花女子出賣青春，有失貞節，本且愛受到身體殘廢個報應，好在佢有供佛個功德，我佛慈悲為本，故所同佢化解為小小斷指個殘缺報應定定，這下佢這一世既經得著報應，壽命終了，又輪迴轉世做狀元爺你了。

（唱老腔山歌）

毋係貧僧有修練，
乜無文曲下凡仙；
前世拜佛功德現，
今生才會中狀元。
事情到這當滿圓，
勸君切莫再迷戀；
從今以後毋使怨，
速速皈依了心願。

馮文彬：多謝住持指點明路，僱願看破紅塵，棄官離家，常伴青燈古佛，隨大師遁入空門，請大師收留。

阿福：（急到環環轉）少爺，使毋得啦！你十年寒窗，盡無簡單正考著狀元，正欲放勢做事，報效國家，光耀門楣，如今若去出家食齋，老爺老夫人毋知會已失望、已傷心，你敢走欸開腳？

馮文彬：阿福，這一切你都有看著，世事無常，若繼續執迷不悟，就難脫輪迴之苦，僱出家係自度度人，將來僱過愛開度吾個爺娘呢！僱這下就先度你，你乜並僱共下出家食齋。

阿福：住持師父啊，你看吾少爺又過恁執性欸，你同佢解勸一下。

性 空：狀元爺，我門本師釋迦牟尼佛早就有規定：「無經過父母同意，不得剃渡出家。」過再講，欲出家修行渡眾生個人，係愛有過去個出世善因，毋係今生講愛出家就做得出家。

馮文彬：若爺哀毋答應佢出家，該愛仰結煞呢？

性 空：第一，你先愛修習斷除自家個執性並心病，第二，你做得用智慧、用信心、用耐心慢慢仔來轉變爺哀個意念；等若個出家因緣成熟了後，菩薩自然會分若爺哀歡歡喜喜答應你出家。

馮文彬：多謝師父個開破，佢會照師父個話去做，等到另日佢想好愛出家，也得著爺哀個同意，請師父絕對使毋得拒絕佢正好。

性 空：狀元爺，佢看你塵緣未了，等你因緣具足以後正過講吧！

馮文彬：師父一席話，勝讀十年書，感恩不盡，就此拜別。

△馮文彬、阿福一同向性空三拜，性空扶起。

性 空：阿彌陀佛，善哉！善哉！

△大隊人馬開拔，馮文彬依依不捨辭別性空。

△（內大合唱二八佳人）

今生才大狀元郎，
前世耿性歌女娘；
輪迴只因重業障，
放下即時心清涼。
樂善好施添油香，
先做駙馬後宰相；
雖無出家做和尚，
護法功德無兩樣。

△幕下。

~全劇終~